

2021
AÑA DI RECUPERACION

2021

ISLA(●)NLINE

Diamars 15 Juni 2021

Email: IslaOnline@gobierno.aw Tel: 528-4900

2021

AÑA DI RECUPERACION

ISLA ONLINE
NOTICIA DI GOBIERNO



GOBIERNO DI ARUBA



Prome Minister Evelyn Wever-Croes: Pa cumpli cu derecho di privacidad y derecho di e ser humano PARTIDONAN POLITICO NO LO RICIBI REGISTRO DI VOTADONAN



Dialuna durante rueda di prensa di Gobierno, Prome Minister sra. Evelyn Wever - Croes a amplia riba entre otro e topico di “kiesersregister”, e registro di votadonan. Pa cual el a informa cu a base di leyman di proteccion di privacidad di e ser humano y den consulta cu diferente instancia, a yega na e conclusion cu no lo comparti e registro aki cu ningun partido politico.

Premier Wever - Croes a splica cu tur aña di eleccion, partidonan politico ta pidi copia di e registro di votadonan. Den ley ta para cu un partido politico tin derecho di pidi y haya dos copia di e registro. Riba e registro tin para nomber, fecha di nacemento, pais di nacemento, adres di e persona y na ki urna e persona ta vota. E areglo aki ta inclui den ley for di basta tempo caba, cu e meta pa asina partidonan politico por controla identidad y por controla ken ta vota na cada urna. Mientrastanto, despues cu e ley a wordo traha, hopi pais a cambia e tipo di areglo aki, sinembargo Aruba so no a cambia su kiesverordening.

Mundialmente a tuma luga hopi desaroyo riba derecho di privacidad como derecho humano (Artikel 8 van het Europees

Verdrag voor de Rechten van de Mens), cu ta e tratado Europeo di derechonan humano. Esey ta pone cu locual ta contene den e kiesverordening Artikel 10, lo mester wordo elimina na Aruba tambe, sino nos ta actuando en contra di e tratado.

E tratado ta stipula cu cada ciudadano tin derecho riba privacidad y cu su adres, fecha di nacemento y pais di nacemento no ta informacion cu por cay den man di tercera sin tin mester. Door di duna e kiesregister na un partido politico, e partido politico por haci cu ne kico cu e kier y e informacion di privacidad di e ciudadano por wordo uza pa otro metanan.

Prome Minister a sigui elabora cu teniendo esaki na cuenta durante ultimo dianan ta haciendo evaluacion y a busca consehonan como Minister encarga cu Asuntonan General y esun cu mester tuma un decision riba e tema. A haya conseho di Directie Wetgeving, di Veiligheidsdienst Aruba, di Consejo Supremo Electoral y Censo. Tur e consehonan aki ta riba un liña cu e tratado art. 8 di EVRM, cual ta pone cu no por duna e kiesregister na partidonan politico. Pasobra a mira caba den pasado cu e ora e informacion ta wordo uza pa otro meta.

E meta di e ley no ta pa uza e kiesregister pa partidonan politico por manda carta na un ciudadano of bay cas di ciudadano y insisti pa e vota of haya sa unda el a nace y haya sa ken ta biba cu ken na cua adres. Esakinan ta informacion priva di cada ciudadano y como Gobierno di Aruba, ta para pa privacidad di e ciudadano. A base di esaki a tuma e decision cu no lo duna e kiesregister na ningun partidonan politico.

Mester bisa cu dos partido a pidi e kiesregister, cual ta partido AVP y partido MEP, ambos a wordo nenga. Partico AVP sinembargo a protesta e decision aki mientras cu Partido MEP a mustra comprension.

Pa resumi Premier Wever - Croes a enfatisa cu pa proteha bo privacidad como ciudadano, ta nenga di duna e informacion aki y ta spera di por conta cu sosten y confiansa di pueblo di Aruba cu e decision aki ta na interes di cada ciudadano.

Prome Minister Evelyn Wever-Croes: Hunto nos ta logrando recuperacion

ARUBA A SURPASA 66 MIL PERSONA VACUNA

71.8 % di nos grandinan ta vacuna



Durante Conferencia di Prensa di Gobierno di Aruba dialuna mainta, Prome Minister Evelyn Wever-Croes a elabora riba Entrante dialuna 14 di juni, Aruba ta na 20 caso positivo y tambe tin un averahe di 3 caso nobo pa dia. E positivity rate ta na 5% riba un averahe di 7 dia. Esaki, Prome Minister ta enfatisa, ta pone cu nos por bisa cu nos tin e parti di e crisis di salud domina.

Pa loke ta e campaña di vacunacion nos ta na 67% di nos poblacion vacuna y nos kier yega 85%. Pa cu esaki nos lo tin campananan adicional cu lo bay cuminsa. Den e grupo di

esnan di 60+ nos ta na 71.8% casi 72% y nos kier yega na 85%.

"Tur esaki ta pone cu nos ta sigui den e plan di crisis pa loke ta trata e recuperacion pero nos ta keda alerta, vigila y evalua cada tres dia pasobra te ainda tur cos ta muestra cu e cifranan ta bahando. P'esey nos ta traha cu e averahe di 7 dia. Si nos ripara cu e cifranan ta existi otro atencion mas estricto, nos lo cuminsa cu esey mesora. Aworaki nos ta enfoca riba recuperacion.

Ora mi ta papia di recuperacion mi ta papia di e recuperacion economico y e salud mental di nos poblacion pasobra e pandemia aki hunto cu tur e medidanan a ocasiona hopi presion riba salud mental di nos ciudadanonan.

Gobierno y Crisis Team a reuni cu Respaldo, AZV y DVG siman pasa y a encarga nan pa bin cu un crisis plan pa con ta bay trata cu e recuperacion di salud mental y den e dianan aki lovmester ricibi e plan aki.

"Nos lo percura pa tin fondonan disponibel pa asina Respaldo, AZV, DVG y otro stakeholders riba e tereno aki por traha riba trece e salud mental den nos comunidad", Prome Minister Evelyn Wever-Croes a termina bisando.

REFLEXION

"Mi kier duna un danki na tur esanan cu a duna di nan parti pa Aruba ta para unda e ta para"

Dialuna mainta durante Conferencia di Prensa di Gobierno di Aruba, Prome Minister Evelyn Wever-Croes a duna un reflexion expresando su graditud pa cada ciudadano di nos pais cu a yuda cu awe nos ta riba e bon caminda pa recuperacion.

"15 luna pasa exactamente dia 13 di maart, tabata e prome biaha cu nos a constata Covid pa di prome biaha aki na Aruba. Durante e tempo ey mi tabata aparece tur anochi dilanti television pa mi purba di mantene e animo halto. Mi tabata bisa "This too shall pass" y mi tabata bisa cu Aruba a enfrenta retonan hopi grandi den pasado y a surpasa cada un. P'esey mi tabata bisa cu mi ta sigur cu como Aruba nos lo surpasa esaki tambe.

Awe 15 luna despues, cu hopi emocion y orguyo hopi grandi,

mi por bisa "this is passing" "this too is passing" y nos como Aruba a uni cu tur e amor y stimacion cu nos tin pa e pida baranca aki y nos a enfrenta e reto mas grandi di e pandemia y nos ta surpasando nan.

Mi kier duna un danki un biaha mas na tur esanan cu a duna di nan parti pa Aruba ta para unda e ta para. Danki na tur e front-liners, esnan den cuido y esnan den orden publico cu a pone nan seguridad na peliger pa yuda otronan. Nan cu a dedica nan alma y cuerpo haciendo sacrificionan grandi di nan mes y nan famia pa otronan por ta sigur y tranquil. Nos front-liners. Tambe cada ciudadano di pais Aruba cu a duna di nan parti, tur cu a cuida nan mes, nan famia y papia cu otronan pa asina awe nos ta unda nos ta. Un danki na e crisis team y tur e profesionalnan cu ta yudando nos pa por tuma e decisionan aki".

Prome Minister Evelyn Wever-Croes: HUNTO NOS TA RECUPERA

“Aruba a uni pa enfrenta e retonan di mas grandi di e pandemia y awe nos ta superando nan”



Dialuna 14 di juni durante rueda di prensa di Gobierno, Prome Minister sra. Evelyn Wever - Croes conhuntamente cu Minister di Finansa, Economia y Cultura, sra. Xiomara Maduro, a presenta e situacion actual di recuperacion economico. Turismo te na e momentonan aki ta recuperando danki na e gran cantidad di turista cu a bin Aruba den e ultimo tempo. Luna di Mei a mira 70.000 turista cual ta un bon cantidad, sinembargo ainda no a yega 100%. Na e momento aki nos ta na 55%. Si e tendencia aki continua, lo cera e aña cu un recuperacion di 68% di nos turismo.

RECUPERACION TURISMO CRUSERO

Diaranson ultimo tabatin e prome barco crusero desde 15 luna pasa. 13 di maart 2020, e mesun fecha cu a constata e prome dos casonan di COVID-19 na Aruba, tabata e ultimo biaha cu tabatin un barco di crusero cu a yega Aruba y sali for di nos waf cu turista abordo.

Siman pasa ora cu e barco crusero a yega tabata un momento di emocion pasobra na momento cu a cera frontera no tabata sa ki dia lo bay bek na normalidad. Aworaki por bisa cu poco poco ta mira esaki.

Pa por a yega na e punto aki tin hopi protocol entre otro, hendenan cu ta vacuna so por ta abordo y nan ta haci test regularmente. Asina a constata cu despues cu e barco a sali for di Aruba, tabatin dos persona asintomatico cu tabata positivo. E personanan aki no tabatin ningun sintoma y pues cu chens minimo di pega un otro persona. Premier Wever - Croes a splica cu mes ora e protocolnan a wordo aplica pa minimalisa e riesgonan cu lo contribui na e exito cu turismo crusero por trece pa Aruba bek. E barco lo bolbe Aruba cada dos siman y cu esaki por bisa cu ta cuminsa bek cu recuperacion riba e area di turismo crusero.

PERSONANAN RICIBIENDO SUBSIDIO Y PAKETE DI CUMINDA

A pesar di e bon noticianan aki, Aruba no ta na 100% di recuperacion turistico. E realidad ta cu tin 4000 persona cu a perde nan trabou duante di pandemia y cu ta ricibi Fase pa nan por purba yega fin di luna y cumpli cu nan gastonan. P'esey no por bisa ainda cu e crisis ta tras di lomba. Apart di esey 14.000 persona cu ta traha den sector priva ta depende di e subsidio di salario cu Gobierno ta duna e doño di trabou (loonsubsidie). Consecuentemente no ta tur hende ta cobrando 100% di nan salario ainda. Varios hende ta cobrando 60% ainda como cu segun doño di trabou ta pa motibo cu nan no a recupera completamente ainda.

Ademas, 1 den cada 5 ciudadano di nos Pais ta depende di pakete di cuminda di crus cora cu Gobierno di Aruba y Fundacion pa nos Comunidad ta tuma over otro luna.

CONTRIBUCION SECTOR PUBLICO Y SEMI PUBLICO

Pa locual ta e contribucion di solidaridad cu a pidi sector publico, tambe ta mira luz na final di e tunnel si e tendencia di crecimiento economico continua. Continuamente ta evalua cuanto persona ta den Fase, Loonsubsidie y cuanto ta depende di pakete di cuminda, pa asina determina e momento cu por cuminsa kita e cortamento di salario riba empleadonan publico y semi publico y bay bek na 100% salario, Prome Minister a splica.

E realidad ta cu Aruba ta recuperando y enfoke di Gobierno ta riba e crecimiento y pa crea mas cupo di trabou pa esnan cu a perde trabou, pa esnan cu no tin trabou y esnan cu kier otro trabou. Trabou cu salario digno pa trece estabilidad riba area laboral. Tin diferente desaroyo andando riba e area turistico, entre otro e proyecto di hotel na San Nicolas Secrets cu ta den acuerdo di ROP/ROPV. Tin mas desaroyo den colony y tambe negociacion andando pa loke ta e refineria. Banda di esaki tambe tin desaroyo na playa pa loke ta edificionan di Gobierno.

Pa resumi Premier Wever Croes a bisa: '15 luna pasa tabata e prome biaha cu a constata COVID-19 na Aruba. Mi tabata para tur anochi na television pa trece informacion y mantene e animo na haltu. Mi tabata bisa: "This too shall pass", Aruba a enfrenta retonan hopi grandi den pasado y a sa di supera nan. Awe por bisa cu hopi emocion y cu gran orguyo: "This too is passing". Aruba a uni den e forsa, amor y stimacion cu tin pa nos pida baranca y enfrenta e retonan di mas grandi di e pandemia cu awe nos por bisa cu ta superando nan. Ta duna danki na tur esnan cu a duna di nan parti pa Aruba ta unda cu nos ta para awor: frontliners, ciudadanonan, crisisteam y profesionalnan den Gobierno.'

Minister Plenipotencario di Aruba na Washington DC, Joselin Croes: **DANKI EVELYN WEVER-CROES**



No obstante pa ken bo a vota cuater aña pasa of ki color politico bo tin actualmente of cual partido gana e proximo eleccion na Aruba, nos mester duna Cesar loke ta di Cesar. Aruba a wordo lidera di un forma excepcional durante e pandemia di COVID-19. Evelyn Wever-Croes como nos Prome Minister no solamente a sa di mantene e pueblo uni y calmo durante e pio crisis cu mundo a conoce, pero danki na e ayudo di Hulanda el a sa di mantene companianan afiota, teniendo hendenan na trabou y cu un entrada minimo pa nan por sobrevivi.

Ta hopi pais na mundo no tawatin un lider manera Evelyn cu a sa di maneha e pandemia di un forma profesional, cu transparencia mantenendo union. Paisnan grandi manera Merca, Brasil, India y Inglatera segun encuesta ta e paisnan cu peor a maneha COVID-19 pa motibo di nonchalance, no promove uzo di tapaboca, no introduci lock-downs na ora, no a promove vacuna y no tawatin suficiente ICU units cual a costa bida di miles.

Paisnan cu a haci miho durante e pandemia tawata Iceland, New Zealand, Taiwan y Singapore, pasobra nan a actua mesora cu lockdown nacional, contact tracing, cuarentena y testmento agresivo. Aruba tawata bendiciona cu un lider cu no a vacila pa actua mesora pa ataca e pandemia. Evelyn a instala un crisis team cu ta inclui profesionalnan den tur area. El a bula bay Hulanda y percura pa Aruba por a presta placa sin interes pa asina nos pais no mester a bati bancarota. El a acudi na IMF pa haya conseho pa por a negocia un miho paquete cu Hulanda. El a para tras di un kateder tur dia cu un smile riba su cara y cu tur pasenshi di mundo y a ripiti tur dia: "bisti tapaboca, laba man, keda cas, proteha bo mes y

bo famia". Cu su lema "this too shall pass" el a brinda nos speransa cu nos lo sali di e pandemia aki.

Cu respet y admiracion mi por bisa cu Evelyn ta un di e miho hefenan cu mi tawatin. Durante e reunionnan di Nacionnan Uni tur hende tabata elogia su elocuencia y conocimiento. Evelyn ta un persona cu no ta drumi, pasobra su mente ta traha miho den tranquilidad di anochi laat. E ta un Mama cu un amor infinito pa su yiunan. Su fe ta dune e guia spiritual cu e mester pa por brinda comprension pa esnan pasando den dificultad. Un persona cu no tin berguensa di bisa "mi ta bay find out y mi lo bin back riba bo pregunta", ora e no sa un contesta. Un persona cu no ta distingui color politico, pero ta wak bo trabou profesional.

Den un articulo den US News skirbi pa Bear y Agner nan ta splica pakico mas pais mester lidernan femenino. Paisnan manera Denmark, Iceland, Finland, New Zealand, Germany y Slovakia na unda tur ta wordo lidera pa un ser femenino, nan a wordo reconoci internacionalmente pa nan forma eficiente di maneho di COVID. Nan a actua pro-activo, implementando distancia social y buscando conseho di expertonan. Nan a unifica nan pueblo cu compasion y comunicacion transparente. Den un otro articulo di Harvard Business Review, Zenger y Folkman a haci un estudio cual a resulta cu hende muhe ta miho lider durante un pandemia. Basa riba e data di e estudio aki esnan cu a wordo entrevista a bisa cu nan kier lidernan cu tin capacidad di "pivot" y siña "skills" nobo, un persona cu ta pone enfasis riba desaroyo di empleadonan, hasta den temponan dificil; ken ta muestra honestidad y integridad y cu ta sensitivo y tin comprension di stress, ansiedad y frustracion cu hende ta sinti. Nan analisis a muestra cu e caracteristicanan aki ta mas desplega cerca lidernan muhe.

Den e tres aña cu mi tawatin e privilegio di traha bou di e maneho di Evelyn, mi por a mira tur e caracteristicanan aki den dje. P'esey mi ta contento y orguyoso di por a biba den un tempo cu un hende muhe a lidera mi isla. Pero mas aun mi ta orguyoso di a biba den un tempo cu un hende muhe a gara e timon den un pandemia feroz cu a azota mundo y a sa di mantene paz, tranquilidad, seguridad y salud na mi isla. No obstante ken gana e proximo eleccion mi ta spera nos tur ta agradecido cu nos tawatin un lider excepcional durante e pandemia cu a azota mundo henter.





Minister Xiomara Maduro ta informa:

ARUBA TA RECUPERANDO POCO POCO DI E CRISIS ECONOMICO CAUSA PA COVID19

Pa fin di 2021 ta spera un recuperacion di 68%



Cada dos siman Minister Maduro di Economia hunto cu Minister President ta reuni cu ehecutivonan di ATA, AHATA, Departamento Economico DEZHI, Aruba Airport Authority AAA y Banco Central CBA pa asina hunto por repasa e pronosticonan pa loqual ta e recuperacion economico di nos Pais. Siman pasa e grupo a bolbe bin hunto y a brinda un bista riba e recuperacion di economia di nos Pais cu ta bayendo den bon rumbo. Informacion di ATA ta muestra cu mas y mas turista ta bolbe bin Aruba despues cu e pandemia a stroba nan plannan pa biaha pa nos isla.

Ya caba Aruba ta ricibi un 55% di e total di turista cu a bishita nos na aña 2019. Si tur cos bay bon, pa fin di 2021 nos por spera un recuperacion den turismo di 68% compara cu aña 2019. Segun dato di AHATA e ocupacion na hotelnan tambe ta bayendo den bon direccion. Hotelnan grandi ta mirando nan grado di ocupacion subi cada bes y AHATA tambe ta comparti e

optimismo cu e cifranan di ATA ta revela. Dato compila pa CBA ta muestra cu e turista cu ta bin Aruba ta lagando mas placa atras y esaki ta un dato hopi positivo pa Aruba su recuperacion economico. E turista cu ta bishita nos Isla den su mayoria ta bin fo'i Merca y na e momentonan aki Merca su economia a cuminsa lora bek cu e efecto cu mas hende ta cuminsa biaha.

Aruba ta keda un destino bunita y sigur den bista di e Mericano y pesey nos por keda mira un crecimiento den turismo di Merca den e tempo nos dilanti. Pa haya un bista riba con Aruba ta para economicamente na e momentonan aki DEZHI a publica su pronostico cu por wordo mira riba <https://www.deaci.aw/proyeccion-economico-2021-2023/>

Tur cos ta muestra cu Aruba ta recuperando poco poco di e crisis economico cu COVID19 a causa pa nos Pais. Ban sigui haci nos esfuerzo pa asina hunto Aruba economicamente por para bek riba su propio pianan.



Economic Outlook 2021 – 2023

MINISTER XIOMARA MADURO TA FELICITA COMUNIDAD FILIPINO PA E CELEBRACION DI 123 AÑA DI INDEPENDENCIA DI FILIPINAS

Diasabra Minister Maduro di Cultura tabata presente na Wilhelminapark pa felicita e comunidad Filipino residencia na Aruba cu e celebracion di e 123 aña di Independencia di Filipinas. Bou di auspicio di Consul General di Filipinas sra Amy Henriquez Mendes, tur presente por a disfruta di un bunita conmemoracion y celebracion di e fecha importante aki pa Filipinonan residencia na Aruba. Minister Maduro ta felicita tur Filipino y ta gradici nan pa nan aporte valioso na desaroyo di Aruba specialmente den sectornan di cuido, turismo y guia spiritual. Masha danki pa stima Aruba y haci di nos Pais bosó hogar.





REGISTRACION

SUBSIDIO DI SALARIO PA LUNA DI JUNI 2021

Tur dunado di trabou cu ricibi un notificacion di SVB
por aplica pa subsidio di salario pa luna di juni 2021


Por **aplica** via MiSVB desde
22 di juni te cu 28 di juni 2021.

Pagonan ta wordo ehecuta diariamente pa
companianan cu nan aplicacion a keda aproba.

Pa pregunta riba Subsidio di Salario
por tuma contacto cu SVB su Service Center via
loonsubsidie@svbaruba.org of subi www.svbaruba.org



XiomaraMaduro.com



Minister Dangui Oduber:

DEN CUADRO DI RECUPERACION DI NOS TURISMO AWE CONHUNTAMENTE CU PROMER EVELYN WEVER-CROES, MINISTER PRESIDENT A BISHITA HYATT REGENCY ARUBA

Nos a haya un recorrido pa wak tur e inversionan cu a wordo haci, nos a combersa cu GM y e empleadonan pa gradici nan pa nan excelente servicio cu nan ta brinda na nos turistanan.

Nos turismo ta recuperando hopi liher y esaki ta danki na e vision cla cu nos a pone nos dilanti. Aruba ta ricibiendo 75.000 turista den luna di juni 2021 y e grado di ocupacion di Hyatt ta 90%.

Aruba ta progresando y awor ta momento pa estabilidad y no aventura.



Eddy Paris:

PROGRESS OF THE OCTS ON THEIR TRANSITION TO SUSTAINABLE ENERGY

**un raport di €34,000 cortesía di Union Europeo cu lo por
yuda Aruba cu e proceso di transforma pa energia sostenibel**



"Renewable Energy Champions".

Aruba sinembargo a keda na e posicion di ta "In Transition"; pues menos di 20% di energia produci na Aruba ta di fuentenan sostenibel.

E molinanan di biento (un proyecto di e gobernacion entre añanan 2001-2009) ta representa rond di 16% di e transicion actual. Esei no ta suficiente, Aruba -no- por keda atras!

Na aña 2019 y principio di aña 2021 mi a presenta diferente opcionnan pa Aruba. Entre otro e concepto pa un planta di desalinacion di awa, Desolenator, caminda cu awa potable for wordo produci cu "award -winning solar technologies " y dus na prijsnan hopi mas atractivo.

E "energy policy" di e gobierno actual ta uno realistico - caminda cu a tene cuenta cu factornan manera areanan protegi (pa e ROP), espacio limita y un poblacion relativamente denso.

Expertonan (manera COWI Belgium) ta confirma cu e meta pa Aruba yega na 50% di energia renovabel pa aña 2030 ta uno factibel y Union Europeo ta brinda diferente plataformanan caminda cu Aruba lo por ricibi subsidio pa proyectonan sostenibel.

Tin hopi trabow nos dilanti pa hasi pa percura pa den e proximo añanan Aruba tambe realmente por bira un Renewable Energy Champion!

Transicion di fossil fuels pa energia sostenibel ya no ta un deseo pero un derecho. E sentencia recién na Hulanda contra e compania multinacional Shell, a confirma cu e proceso di transicion di fossil fuels pa energia sostenibel "is een mensenrechten kwestie".

Dialuna awor, 14 di juni, e Presidente Mericano, Joe Biden, lo ta na Bruselas pa hunto cu e lidernan di Union Europeo ditenia un direccion pa "un mihor mundo despues di e corona-crisis; un futuro mas sostenibel y prospero".

Un punto halto ariba e agenda di e lidernan aki - kendenan ta representa mas di 60% di e economia mundial- ta e "European Green Deal".

Na aña 2020 OCTA a contrata un compania experto pa compila e raport; "Progress of the OCTs on their Transition to Sustainable Energy". E raport aki a confirma cu diferente paisnan miembro di OCTA a avansa pa e categoria di






GOBIERNO DI ARUBA

ARUBA A SURPASA 66.000 PERSONA VACUNA

“ Masha danki pa e confiansa,
Hunto nos ta logrando
nos recuperacion ”



Departamento di Salud Publico:

UPDATE 15 DI JUNI 2021

Segun resumen di awe 2 persona a recupera, a registra total 3 caso nobo di Covid-19, di cual tur ta residente. E cantidad total di testnan ehecuta ayera na e diferente localidadnan na Aruba, entre otro laboratorio di hospital, laboratorionan priva y aeropuerto ta 410 test. 'Positivity rate' entre nos residentenan ta 3%.

Casonan activo pa awe ta 19, cantidad di fayecido relaciona cu Covid-19 ta 107.

Cantidad di personanan vacuna ta 66.236 cuta representa un promedio di 67% di nos poblacio di 18 aña bay ariba.

  ARUBA COVID-19			
15/6/2021	TOTAL	RESIDENTE	NO-RESIDENTE
Casonan Nobo	3	3	0
Activo	18	16	3
Recupera	10958	10070	888
Positivo	11084	10192	892
Negativo	160027	-	-
Getest	171739	-	-
Getest na Airport	119384	-	-
Morto	107	106	1





Un Feliz Dia

GABINETE WEVER-CROES

ISLA ONLINE

NOTICIA DI GOBIERNO